

շրջանները, որտեղ հունական տառադարձությամբ տոներ կոչվում էր Βαρτοβαρ, Βαρτοβαριά⁵⁸; Լեոնային Ղարաբաղում առանձնապես պաշտելի էին Մուսլի, Մեծ Քիրսի և Դիզափայտի՝ Զիարաթի գաղաթները⁵⁹: Զանգեզուրում Սիսիանի՝ Բիշանաղի լեռնանցքից դեպի հյուսիս շղթայի սեփն բարձրացող Սարվարդի՝ Սալվարդի, Նուբուրի՝ Ուշթափալարի սարահարթի հյուսիսային եզրին իր գեղատեսիլ զանգվածով բազմած Մեծ Իշխանասարը՝ Մեծ Իշխիսին, իսկ ավելի հարավ՝ Մեղրու (Մեղրի-Գյունեյի կամ Զավնդուրի, Արևիքի) լեռնաբազուկից դեպի հյուսիս առանձնանում է մի լեռնային ուտ: Նրա ծայրին ուղվագծվում է Խուստուփի գաղաթը, որի զանգվածն ամեն կողմից լավ երևում է իբրև մի վիթխարի հովանավոր-նահապետ շրջակա ավելի կարճահասակ գաղաթների ընտանիքի մեջ:

Սարվարդը սրբազան լեռ էր մանավանդ Սիսիանի և հարևան Նախիջևանի վերին գետահովտի թե՛ հայ, թե՛ թուրք բնակչության համար և կրում էր հայերեն Աղօթարան անունը: Աղոթելիս կամ երգելիս տեղացիք նրա զորությանն ու վկայությանն էին դիմում և նրա կողմն էլ դարձնում երեսները: Այստեղ մի քանի արդեն անծածկ սենյակներից երկուսն իրար կցված ուխտատեղիներ էին, որոնցից մեկի մեջ խոյաձև արձան կա: Ուխտավորները քարերի վրայից պատերին կապում էին գույնզգույն շորեր, ցցում էին մեխեր, կախում էին պայտեր և այլն:

Սարվարդից արևելք Լորաձորի նույնպես թե՛ հայ և թե՛ թուրք բնակիչների համար նվիրական էր Քարաժայուր՝ Ղարա-Ղայան, որտեղ գաղաթին ոչ գերեզման կա, ոչ խաչարձան, միայն մի հիսուն տարի առաջ այստեղի սրբավայրում Լեոնաշենի՝ Շենաթաղի քահանան շինել էր մի փոքրիկ մատուռ⁶⁰:

Նույնպես Շաղաթ՝ Շեքի գյուղի մոտ Քեշաբերդի սարից հարավ բարձրացող ձգնավորի սարի գաղաթին պաշտվում էր ցցված ժայուր, որը կարծես մարդու ձեռքով պրիզմայաձև քարերից շարված լինի⁶¹: Վարդավառի տոնին երկու սրբավայրերն էլ բարեպաշտ բնակիչների ուխտագնացության վայրեր էին: ձգնավորի սարի գաղաթին երաշտի ժամանակ մատաղներ էին բերում: Հիվանդ երեխաներին անց էին կացնում ժայուի մեջ գոյացած նեղ ծակով:

Մեծ Իշխանասարը՝ Մեծ Իշխիսին տեղացիների մեջ հայտնի է նաև որպես Սրփ Օհանէսի սար: Նա ավելի մատչելի է հյուսիս-արևելյան կողմից, որտեղ նրա ստորոտից ոչ հեռու կանաչ ափերի մեջ փոխվում է Սևիճի՝ Վարա-գծլի կապտավուն հայելին: Հին ժամանակ այժմյան Գարիսի վարչական շրջանի գրեթե բոլոր գյուղերից բազմաթիվ ուխտավորներ, ո՛րք ձիով կամ ջորիով, ո՛րք բոբիկ ոտով, անողորմաբար բզելով ծանր բարձած անասունը, ընտանիքի մեծ ու փոքրով շրջապատված՝ շտապում էին Վարդավառի տոնին սարը բարձրանալ: Իրենց բեռը ներքևում՝ սարի ստորոտին թողնելով, նրանք մի քանի արահետներով շարան-շարան ձգվում էին սարն ի վեր դեպի գաղա-

⁵⁸ Անտոնեան Ը., Հայերէն արմատ. բառ., հ. VI, էջ 596:

⁵⁹ Ախալքալաքի գավառը, Զավաթը հնագիտական տեսակետով նկարագրող Ի. Պ. Ռոստոմովն իր «Ахалкалакский уезд в археологическом отношении», СМОМПК, вып. XXV, отд. I, էջ 23 աշխատության մեջ խոսելով այն մասին, որ տեղական հայերը բարձրանալով մեծ Աբուլ սարը, այնտեղ երկրպագում էին մի երկար քարի, որ ունի մոտ մեկ սաժեն երկարություն, ավելացնում է՝ «Այս սովորությունը թվում է ինձ զուտ հայկական ծագում ունի»: Նա նման սովորություն չգիտե վրացական կենցաղի մեջ:

⁶⁰ Կալայեան Ն., Սիսիան, էջ 58:

⁶¹ Նույն տեղը, էջ 86: